

Ya unan hulat ni apostol Pedro

Paunan habi ha unan hulat ni apostol Pedro

Habaytsi ya una kanlan loway hulat ya hinulat ni apostol Simon Pedro, ya miha kanlan labin-loway apostol ni Panginoon Jesu-Cristo. Hinulatan nay kapareho nan Israelita ya ampaniwala kan Panginoon Jesu-Cristo, ya napitatayak ha ayri man ya logal ha lokop hên Asia Menor ta ampairapan hila gawan ha paniwala la kan Apo Jesu-Cristo. Habaytsi ya hulat ay ampataniêh hên nakêm lan ampairapan. An-ipaihip na kanla ya Mangêd ya Habi tungkol kan Apo Jesu-Cristo. Inungkat na êt ya tungkol ha kamatsan, pangabiyay oman haka ya pamag-orong hên Panginoon ya ampam-in kasiguradoan ya mabyay hilan oman etaman. Gawan ha muwang lay habaytoy kaptêgan, ay dapat la dayin tanggapên, haka têêhêن ya hinon kaparusaan. Inaralan na hila êt no ay-êmên ya kaihipan haka pamimiyay la ay dapat mag-in ayn kapintasan nanad ha kaihipan haka pamimiyay ni Apo Jesu-Cristo. Dapat palokop hila ha kaganawan ampa-maalaa kanla. Dapat mag-in maaypa ya nakêm lan ampamaala kanlan kapareho lan ampaniwala. Dapat milulugud ya hilay ampaniwala.

Kabooan hên pinakalaman

Umpisan hulat 1:1-2

Pamanêmtêm hên tungkol ha pamiligtas ya ubat
kan Apo Namalyari 1:3-12

Ya tungkol ha pamimiyay ya ayn kapintasan
 1:13-2:10
 Dapat makatêêh ha kaparusaan 2:11-4:19
 Dapat maaypan nakêm hên humonol kan Apo
 Jesu-Cristo 5:1-11
 Ya tawlin habi 5:12-14

¹ Hiko hi Simon Pedro, ya mihay apostol ni Apo Jesu-Cristo. Anhulatan kataw, ya namibalag hên mantêg yon bali, haka napitatayak ha probinsyan Ponto, Galacia, Capadocia, Asia, haka Bitinia.
² Hên hato pon, ay pinili na kaw ni Tatang tamo, hi Apo Namalyari, ta muwang nay mag-in anak na kaw. Pinili na kaw ta êmêñ kaw mag-in mahonol kan Apo Jesu-Cristo ha kapangyarihan hên Espiritu na, ya hinumapat kamoyu ta pinatawad ya kasalanan yo gawan ha daya ni Apo Jesu-Cristo hên hiyay pinatsi.

An-ihalangin kataw ya pahanan ni Apo Namalyari ya kapatêkbêkan yo haka ya ingalo na kamoyu.

Ya biyay ya ayn anggay aya an-êngganan tamo

³ Purién tamo hi Apo Namalyari ya Diyos, haka ya Tatang ni Panginoon tamon Jesu-Cristo. Gawan ha ingalo na, ya ayn kapantag, ay dinyanan na kitamon bayoy biyay gawan biniyay oman hi Apo Jesu-Cristo. Kabay sigurado kay ya matanggap naêñ ya mangangêd ya an-êngganan tamo ⁴ ya nakal-an ha langit. Habaytoy a angkahira, a andumawak, haka a mabaw-ahan alagá. ⁵ Matanggap yoy habayto lano no tuparêñ ni Apo Namalyari ya kaligtasan yo ha katatawlian allo, haka ya

kapangyarihan na etaman ya mangillag kamoyu, gawan ha paniwala yo kan Apo Jesu-Cristo.

6 Gawan habayto, ay malyari kaw hēn maghigla, agyan angkaranasan yo ya hinon kairapan hēn panubuk. **7** Ta ya kairapan ay pamanubuk, ta êmēn mamwangan no pêtêg ya paniwala tamo kana. Nanad ha pamanubuk ha ginto. Ya paniwala tamo ya ayn anggaan, ay maalagá êt ha ginto ya main anggaan. No pêtêg ya paniwala tamo, ay lano ha pamag-orong ni Apo Jesu-Cristo, ay pansinêñ, dayêwêñ, haka galangêñ kitamo ni Apo Namalyari. **8** A yo man êt nahêlêk hi Panginoon Jesu-Cristo, ay anlugurêñ yo ya. A yo ya man angkahêlêk amêhêñ, ay ampaniwala kaw kana. Kabay a makwan ihipêñ ya kahiglaan yo ya ayn kapantag, **9** gawan angkatanggap yoy nay kaligtasan, ha paniwala yo kan Apo Jesu-Cristo.

10 Habaytoy kaligtasan tamo ya indin kantamo gawan ha ingalo ni Apo Namalyari, ay impamwang lan mâmipamwang hēn an-ipaihip na kanla hēn hato, noa, a la taganán angkaintindihan ya habayto, pinag-aralan la man hēn mangêd. **11** Ta taganán labay lan mamwangan no makano, haka no ay-êmēn matupad ya impapapêt kanla hēn Espiritu ni Cristo. Ta ya impapapêt kanla, ay yabay ya kairapan ya têéhêñ na, ya pangabiyay nan oman, haka ya pamag-orong na ha langit. **12** Impamwang kanla, ya alwan ha ikakangêd la, noa, ha ikakangêd tamo ya papêt la. Yabay ya Mangêd ya Habi tungkol kan Apo Jesu-Cristo ya impalinaw kamoyu hēn kalamo kon hinapatan hēn Espiritu ni Apo Namalyari ya in-utoh nan ubat

ha langit. Hila man ya anghel ni Apo Namalyari, ay labay la dayi hēn maintindihan ya habayto.

Dapat mag-in ayn kapintasan ya biyay tamo.

¹³ Gawan ha kal-atan ya dinyag ni Apo Namalyari ha ikakangēd tamo, ay il-an tamoy ihip tamo hēn manyag kalabayan na hēn main pamagpigil ha sarili. Pakataniēhēn tamoy nakēm tamo ha pamangēnggan tamo ha ingalo na kantamo ha pamag-orong ni Jesu-Cristo. ¹⁴ Gawan hikitamoy mahonol ya anak ni Apo Namalyari, ay paan kitaminan manyag hēn karawakan kalabayan lawini ya mana tamon andaygēn, hēn alwa kitamo êt hēn anak na. ¹⁵ Noa, dapat tuwarēn tamoy pamimiyay ya taganán ayn kapintasan, ta hi Apo Namalyari ya namili kantamo hēn mag-in kana, ay banal. ¹⁶ Gawan nakahulat ha Kahulatan ya impahulat ni Apo Namalyari, ya êmēn di, “Dapat kaw mag-in banal gawan hikoy banal.”*

¹⁷ A ya ampamilin tawo hi Apo Namalyari, ya ambaēgēn yon Tatang. Ampanatol ya do ha dinyag hēn balang miha. Kabay dapat yo yan galangēn, kaban ampamiyay kaw di ha luta. ¹⁸ Muwang tamo ya hikitamoy inlitas ha ayn pukat ya pamimiyay ya pinuli tamo ha ninuno tamo. Ya pinamayad hēn habaytoy kaligtasan tamo ay alwan nanad ginto haka pilak ya angkaalihan alagá, ¹⁹ ta ya pinamayad kaligtasan tamo, ay maalagay daya ni Apo Jesu-Cristo. Hiyay nanad ha biseron tupa ya ayn kapintasan ya in-átang kan Apo Namalyari. ²⁰ Hiyay pinili ni Apo Namalyari hēn a êt dinyag ya hata luta, noa, babayo

* **1:16** Levítico 11:44 haka 19:2.

yan impamwang ha ikakangêd tamo amêhêna ya marani ya anggaan hên luta. ²¹ Gawan kana, ay ampagtsiwala kitamina kan Apo Namalyari, ya namabiyay kanan oman, haka namiorong kana ha langit hên mamaala hên kalamo na. Kabay nakapéptêng ya paniwala tamo kan Apo Namalyari haka an-êngganan tamoy impangako na.

²² Gawan nalinisan taminay nakêm tamo ha pamanhumonol tamo ha kaptêgan ya tungkol kan Apo Jesu-Cristo, ay pêtêg ya pamilulugud tamon patêl ha Panginoon. Kabay ihundo tamoy pamilulugud tamo hên booy nakêm. ²³ Habaytoy nanad in-anak kitamon oman, haka hata bayoy biyay ay alwan ubat ha tawo ya matsu, noa, habaytoy ubat ha habi ni Apo Namalyari ya angkabiyay ya taganán a ampangoman. ²⁴ Gawan ya nakahulat ha Kahulatan ya impahulat ni Apo Namalyari, ay êmên di,

“Hilay tawo ay nanad lamon ya tampol angkayango, haka ya ikadayêw la, ay a angkabuyot, ya nanad bulaklak ya angkawnggêy,

²⁵ noa, ya habi hên Panginoon, ay taganán a ampangoman hên angga-angga.”[†]

Yabay ya Mangêd ya Habi tungkol kan Apo Jesu-Cristo ya impamwang kamoyu.

2

Hi Panginoon Jesu-Cristo ay nanad ha pinaka-maalagáy bato

[†] **1:25** Isaias 40:6-8.

¹ Kabay alihêñ yoy na ya panyag yo hêñ hinon karawakan, hinon kalokwan, pagbabara, karidyaan, haka hinon pamaniran kapareho tamo. ² Dapat maghinta kitamo ha habi ni Apo Namalyari, hêñ nanad ha kapianak ya maghinta ha gatas, ta êmêñ humkaw ya paniwala tamo angga ha matupad ya kaligtasan tamo. ³ Daygêñ tamoy habayto gawan napaptêgan tamoy ingalo hêñ Panginoon.

⁴ Paidani kaw kan Apo Jesu-Cristo ta taganán angkabiyay ya. Hiyay nanad ha mihay bato ya in-il-an ha pamanyag bali, noa, hiyay a tinanggap hêñ tawo. Émbayro man, hiyay maalagá ha hêlêk ni Apo Namalyari ya namili kana. ⁵ Hikitamo ya dinyanan biyay ni Apo Namalyari, ay nanad etaman bato ya an-il-an ha pamanyag hêñ pagsimbaan kana, gawan hikitamo ay andaygêñ nan angkapi-tsi-tsipon ya ampagsimba kana. Pinili na kitamo hêñ mag-in pinakapari na, haka ya paghuyo haka pamagpuri tamo kana ay pinakaátang tamo kana. Habaytoy madyag tamo gawan kan Apo Jesu-Cristo ha ikahigla ni Apo Namalyari. ⁶ Muwang tamo ya pêtêg ya habayto, gawan nakahulat ha Kahulatan ya impahulat ni Apo Namalyari, ya êmêñ di:

“Lêng-êñ yo! Main akon pinili, ya idistino ko ha balayan Sion. Hiyay nanad maalagáy bato ya pampah-êy hêñ bali, haka hilay maniwala kana ay a mahira ya nakêm.”*

⁷ Kabay hikitamoy ampaniwala kana, ay an-itad tamo yan maalagá. Noa, hilay a ampaniwala

* ^{2:6} Isaias 28:16.

kana, ay dapat lan ihipêñ ya impahulat ni Apo Namalyari, ya êmên di:

“Ya bato ya intapon lan manyag bali, ay yabay ya nag-in pinakamaalagáy bato, ya namapah-êy hêñ bali.”[†]

⁸ Haka na impahulat etaman ya êmên di:

“Habaytoy bato ay kapibatolán.”[‡]

Hêñ haton lagi êt, ay tinalagá nay na ni Apo Namalyari ya êmbayro ya malyari kanla, gawan ha a hila humonol ha Mangêd ya Habi tungkol kan Apo Jesu-Cristo.

⁹ Noa, hikitamoy patêl ha Panginoon ya ampaniwala kan Apo Jesu-Cristo, ay pinili ni Apo Namalyari hêñ mag-in kana. Hikitamoy láhi na, ya ampaghuyó kana hêñ nanad pari ya ampipaghuyó ha pinakapoon la ha langit, ta êmên tamo ipamwang ya kapapaêpapah ya dyag na gawan in-alíh na kitamo ha karigléman hêñ kasalanan, ta gintan na kitamo ha kapapaêpapah ya kahawangan hêñ lokop na. ¹⁰ Hêñ haton una, ay alwa kitamo êt kana, haka a kitamo êt nakatanggap ingalo na, noa, amêhêñ ay kana kitamina, haka natanggap taminay ingalo na.

*Dapat palokop ha kaganawan main tungkulán
haka panay manyag kangéran*

¹¹ Anlugurêñ kon patêl ha Panginoon ya napitatayak, ya ampaglaêh pon ha marayo, am-pakihabi ko kamoyu ya paan kaw manyag hêñ karawakan kalabayan lawini, ta ya pamanyag hêñ habayto ay anlumaban ha paniwala yo kan Apo Jesu-Cristo. ¹² Dapat mamiyay kitamo hêñ

† 2:7 Awit 118:22. ‡ 2:8 Isaias 8.14.

mangêd hên kalamo hilay a ampagpalokop kan Apo Namalyari, ta habiên la man, ya hikitamoy mapanyag hên nangarawak, ay mahélêk la, ya mangangêd ya dyag tamo, haka la bayto puriên hi Apo Namalyari ha pamanlumatêng na hên manatol.

¹³ Gawan ha Panginoon, ay dapat palokop kitamo ha kaganawan main tungkulon bayri ha luta. Dapat palokop kitamo ha pinakapoon tamo. ¹⁴ Dapat palokop kitamo etaman kanlan gobernador haka ya kaatag ya an-iutoh hên pinakapoon hên mamarusa kanlan mapanyag karawakan, haka mam-in pamandayêw kanlan mapanyag kangérân. ¹⁵ Ta ya labay ni Apo Namalyari, ay gawan ha pamimiyay tamo hên ayn kapintasan, ay ayn hilan mahabi ya tungkol kana ya hilay ayn minuwang, ya anhumalanghang kana. ¹⁶ Hikitamoy ampaniwala ha Panginoon, ay alway nan ipoh hên hinoman, haka habaytoy dapat mahélêk ha biyay tamo. Noa, habayto ay a labay habiên ya malyari kitaminan manyag karawakan. Ta dapat kitamon mamiyay hên nanad tagahuyo ni Apo Namalyari. ¹⁷ Dapat tamon galangên ya balang hino. Dapat lugurên tamo hilay patêl tamo ha Panginoon. Dapat igalang tamo hi Apo Namalyari haka ya pinakapoon hên bansa tamo.

Têêhênyâ hadyay kairapan hên ayn hakit nakêm

¹⁸ Hikaw ya ipoh, ay palokop kaw ha amo yo hên main pamanggalang, maingaloên hila o alwa man. ¹⁹ Mangêd no daygên yoy habayto, ta ikahigla kaw ni Apo Namalyari, no gawan ha muwang yo ya, ay ampakatêéh kaw ha hadyay

kairapan, agyan ayn kaw hēn kasalanan. ²⁰ Noa, no alimbawa ta nanyag kaw hēn karawakan, yarin maipagmahlay yo ya pamagtēh yo ha parusa yo! Ahê! Noa, dayēwēn kaw ni Apo Namalyari no ampakatēh kaw ha hadyay kairapan ya lumatēng kamoyu gawan ampanyag kaw hēn kangēran. ²¹ Ta tinalagá ni Apo Namalyari, ya hikitamoy pinili na, ay magtēh hēn hadyay kairapan. Panēmtēman yo ya hadyay kairapan ya dinanan ni Apo Jesu-Cristo ha ikaligtas tamo, hēn ayn hakit nakêm. Haka ha dinyag na, ay dinyanan na kitamont alimbawa ya dapat tamon honolēn. ²² Hi Apo Jesu-Cristo ay a nanyag hēn hinon kasalanan, haka taganán a ya naglaram. ²³ Hēn minusmus la ya, ay a ya nanumbah hēn naghabi hēn narawak. Hēn pinairapan la ya, ay a ya nanumbah kanla. Pinaulayan na hila kan Apo Namalyari ya mangēd ya mangatoynungan. ²⁴ Ha pangamatsi na ha koros, ay hiyay nagdusa gawan ha kasalanan tamo, ta êmēn tamo talibatokan ya kasalanan tamo haka mamiyyay hēn mahonol kana. Gawan ha pangamatsi na, ay naiúmang kitamo kan Apo Namalyari ya nanad ha tinambalan kitamo. ²⁵ Hikitamoy nanad tupa ya nitama, noa, amêhēn ay nag-orong kitamina kan Apo Jesu-Cristo, ya pinakapastol, ya ampangillag kantamo.

3

Ya aral kanlan miahawa

¹ Embayro êt, ay hikaw ya babayi, ay kailangan yon palokop ha ahawa yo, ta no main a pon ampanhumonol ha habi ni Apo Namalyari, ay ma-

paniwala hila, gawan ha kangérān pamimiyay yo. Mapaniwala hila, agyan a kaw maghabi, ² uston mahélêk lay pamanggalang yo haka ya malinis ya pamimiyay yo. ³ Pakaihipén yo, ya kahampatan yo ay alwa ha pangayos lawini, nanad ha paytuyo hēn habot, o ha panggamit hēn ginto, o pagbaro hēn mangahampat. ⁴ Noa, ya dapat magin kahampatan yo, ya an-ikahigla ni Apo Namalyari, ay hatoy a ampangoman ya atsi ha nakêm ya maaypa, haka main kapatékbékan. ⁵ Èmén ya bayro ya pamimiyay lan babayi ya maka-Diyos hēn haton lagi, ya ampagtsiwala kan Apo Namalyari. Ya pagpalokop la ha ahawa la, ay namahampat kanla. ⁶ Habaytoy nanad kan Sara ya ahawa ni Abraham, ya hinumonol kan Abraham, ya binaég nan ámo na, ha pamanggalang na kana. Hikaw ya babayi améhēn ay manoto kaw kan Sara, no ampamiyay kaw hēn main kangérān, haka no alwa kaw malimo, hinoman ya malyari.

⁷ Hikaw ya lalaki etaman, ay dapat yon galangén haka lugurén ya ahawa yo ha pamilalamo yo, ta alwan makhaw ya lawini lan babayi, haka dinyanan hila etaman ni Apo Namalyari hēn biyay ya ayn angga. Dapat yon daygén ya habayto, ta èmén ayn makahabkol ha panalangin yo.

*Têêhêñ yoy pamagdusa ya lumatêng kamoyu
agyan ampanyag kaw hēn kangérān*

⁸ Améhēn, ay ubuhêñ kataw hēn aralan, ya dapat main kaw hēn pakikimiha, mi-iingalo kaw, milulugud kaw, dapat panay mangêd ya nakêm yo, haka magpakaaypa kaw hēn nakêm ha miha ta miha. ⁹ Dapat a yon tumbahan hēn

karawakan, ya hilay ampanyag hēn karawakan kamoyu. Haka paan kaw maghabin narawak kanlan ampaghabin narawak kamoyu. Noa, ihalangin yo hila, ya ingalwan na hila, ta pinili na kaw etaman ni Apo Namalyari hēn mag-in kana, ta êmēn na kaw ingalwan. ¹⁰ Ya nakahulat ha Kahulatan ya impahulat ni Apo Namalyari ay êmēn di:

“Hilay mabay hēn mag-in mahigla haka mangêd ya biyay la, ay dapat patgênan lay pamaghabi hēn nangarawak haka alwan pêtêg.

¹¹ Dapat patgênan lay pamanyag hēn nangarawak, ta pakikwanan hila tanan manyag hēn panay kangêran, ta êmêñ mangêd ya pamakilamo la ha kapareho la.

¹² Ta ya Panginoon ay ampangillag kanlan manhonol kana, haka gilamêñ nay panalangin la. Noa, ampanalanghang ya kanlan mapanyag karawakan.”

¹³ Yarin main makapairap kamoyu no pakikwanan yon manyag kangêran! ¹⁴ Noa, makaranas kaw man hēn pamagdusa gawan ha pamanhumonol yo kan Apo Namalyari, ay malyari kaw hēn maghigla, ta ya ingalo na ay atsi kamoyu. Kabay paan kaw malimo haka paan kaw manyagah, ¹⁵ noa, dapat yon simbaêñ hi Apo Jesu-Cristo, hēn daygêñ yo yan Panginoon ha biyay yo. Dapat panay kaw nakal-an hēn makibat kanlan mangotâng kamoyu hēn tungkol ha kasiguradoan yo ya iligtas na kaw ni Apo Namalyari. ¹⁶ Noa, dapat naamêy ya pamaghabi yo kanla hēn main pamanggalang. Dapat panay malinis ya konsinsya

yo, ta êmên mipakarêng-êy hilay ampaghabin pamira kamoyu gawan ha mangêd ya pamimiyay yo, ha pamanhumonol yo kan Apo Jesu-Cristo. ¹⁷ Ta mangêd ya makaranas kitamon pamagdusa gawan ha pamanhumonol tamo ha kalabayan ni Apo Namalyari, kanan makaranas kitamon pamagdusa ha pamanyag hên karawakan. ¹⁸ Ta natsi ya hi Apo Jesu-Cristo gawan ha kasalanan tamo. Minghan yan natsi, haka a yay nan matsin oman. Hiya ya ayn hinon kasalanan, ay natsi para kantamon makasaranan, ta êmên na kitamo maiúmag kan Apo Namalyari. Pinatsi la man ya lawini na, ay biniyay yan oman hên Espiritu ni Apo Namalyari. ¹⁹ Ha kapangyarihan nan habaytoy Espiritu ni Apo Namalyari, ay nanoro ya kanlan espiritu lan natsi, ya nakahukul. ²⁰ Hila ya habaytoy a hinumonol kan Apo Namalyari hên panaon ni apo Noe. Pinagtêéhan na hilan inêngganan ni Apo Namalyari êmên hila dayi maghêhê ha kasalanan la, kaban ampanyag hi apo Noe hên barko. Noa, gawan a hila naghêhê, ay wawalo hila tana, ya naligtas ha lanêm. Yabay ya hilan Noe. ²¹ Bayro kitamon makakwan alimbawa hên kaligtasan tamo, gawan hên binawtismoan kitamo ay inligtas kitamo ha parusa. Ta ya pamawtismo, ay alwan êmên ha pangalih hên yangat ha lawini tamo, noa, mihay pangako kan Apo Namalyari ya honolên tamo ya, gawan muwang tamo ya pinatawad ya kasalanan tamo. Main kitamon kaligtasan gawan biniyay oman hi Apo Jesu-Cristo, ²² ya nag-orong ha langit, haka atsi yay na ha dapit panabtab ni Apo Namalyari. Amêhê,

hilay anghel, haka hilay kaganawan main kapangyarihan haka kaganawan main tungkulon ay ampagpalokop kana.

4

Ya bayoy biyay

¹ Gawan hadyay kairapan ya nadanasan ni Apo Jesu-Cristo hên atsi ya di ha luta, ay dapat tamo êt hên ilêan ya sarili tamo hên têêhêñ ya kairapan, ta no ihundo tamoy pamanhumonol kan Apo Namalyari, angkatanam tamo man ya kairapan, ay mapaptégan ya tinalibatokan tamoy kasalanan.

² Paubat amêhêñ angga ha matsi kitamo, ay honolên taminay kalabayan ni Apo Namalyari. Alway nan sarili tamon kalabayan ya mahonol.

³ Hukad anay panaon ya hinayang tamo ha pamanyag karawakan, ya nanad ha andaygêñ lan a ampagpalokop kan Apo Namalyari, ya nanad ha pamanyag karawakan kalabayan lawini hên ayn pamagpigel ha sarili, pamaglahing, pamakilahing hên ayn têgêñ, kapaparêng-éy ya dyag ha pamagsimba ha alwan pêtêg ya diyos. ⁴ Ampag-êpapah hilay ayn paniwala kan Apo Namalyari, no awta a kaw na ampakilamo kanla ha pamanyag karawakan kalabayan lawini hên ayn pamagpigel ha sarili, kabay anhiraén la kaw.

⁵ Noa, Iano tumbahan hila ta kiarap hila kan Apo Namalyari, ta nakal-an yan hatolan ya hilay angkabiyay pon, haka hilay natsi. ⁶ Kabay impamwang etaman Ya Mangêd ya Habi tungkol kan Apo Jesu-Cristo kanlan natsi, ta êmén hila makapaghêhê ha kasalanan la, haka mamiyay hên ayn angga hên nanad kan

Apo Namalyari, natsi man ya lawini la hēn nanad ha lawini hēn balang miha.*

Ya kaganawan daygēn tamo, ay dapat ha kapangyarihan ni Apo Jesu-Cristo

⁷ Marani ya anggaan hēn luta, kabay pakataniêhēn yoy nakêm yo, êmēn yo mapigil ya sarili yo, ta êmēn makapanalangin kaw hēn mangêd. ⁸ Igit ha kal-atan, ay dapat milulugud kaw hēn boon nakêm, ta no milulugud kitamo, ay panay kitamon ampamatawad. ⁹ Pakahigla kaw hēn mamahowēn kanlan patêl ha Panginoon. ¹⁰ Hino-hino kay na hēn ya galing haka kamwangan ya indin ni Apo Namalyari ha balang miha. Kabay dapat tamon gamitêñ ya habayto ta êmêñ mapakinabangnan lan patêl tamo ha Panginoon. ¹¹ Hinoman kantamo ya dinyanan galing hēn manoro, ay dapat pakaihipêñ ya habaytoy an-itoro tamo ay habi ni Apo Namalyari. Hinoman kantamo ya dinyanan nan galing hēn maghuyo, ay dapat maghuyo ha hêkaw ya an-idin ni Apo Namalyari kantamo, ta êmêñ masimba hi Apo Namalyari gawan kan Apo Jesu-Cristo ha kaganawan dyag tamo. Purién hi Apo Namalyari ya makapangyarihan hēn ayn angga. Amen.

Hadyay kairapan ya pamanubuk kanlan ampaniwala kan Apo Jesu-Cristo

¹² Anlugurêñ kon patêl ha Panginoon, paan kaw mag-êpapah ha hadyay kairapan hēn pamanubuk ya angkaranasan yo, ta habayto ay

* **4:6** Roma 5:12-17.

taganán angkalyari ha ampaniwala kan Apo Jesu-Cristo. ¹³ Paan kaw mag-êpapah, noa, humigla kaw, ta angkaranasan yoy haday kairapan ya nanad ha nadanasan ni Apo Jesu-Cristo, ta êmén kaw humigla lano, haka man-angaw kaw gawan ha kahiglaan yo, ha pampipamwang ya kapahilêw ya panga-Diyos na. ¹⁴ Iningalwan kaw no gawan ha paniwala yo kan Apo Jesu-Cristo ay main maghabin pamanira kamoyu, ta ya labay habiên hên habayto, ay atsi kamoyu ya makapangyarihan ya Espiritu ni Apo Namalyari. ¹⁵ Paan kaw mamatsin kapareho, o manakaw, o manyag kaatag pon ya karawakan, o makiêmén ha alwan dapat pakiêménan. Ta usto ya pairapan kaw no manyag kaw hên êmbayro. ¹⁶ Noa, paan kaw marêng-êy no makaranas kaw hên pamagdusa gawan ha paniwala yo kan Apo Jesu-Cristo, nokay puriên yo hi Apo Namalyari, gawan hikaw ay ambalayên hên kalamo lan ampaniwala kana. ¹⁷ Ta nilumatêng ya panaon hên pamanatol ni Apo Namalyari, haka hikitamo ya atsi ha pamilya na, ay una hên hatolan. No hata kairapan ya angkaranasan tamo, ay umpisan pamanatol, ay kapalimo taganá ya malyari kanlan a anhumonol ha Mangangêd ya Habi ya ubat kan Apo Namalyari! ¹⁸ Êmén ya di ya nakahulat ha Kahulatan ya impahulat na:

“No kairapan ya angkaranasan lan miligtas, ya mahonol kan Apo Namalyari, ay hino baytoy malyari kanlan mapanyag kasalanan, ya alwan maka-Diyos!”

¹⁹ Kabay no ampakaranas kaw hên kairapan

gawan ha kalabayan ni Apo Namalyari, ay ihundo yoy pamanyag yo hēn kangēran, haka ipatsiwala yoy sarili yo kanan nanyag kamoyu, ya a ampa-maulay kamoyu.

5

Ya aral kanlan nanad pastol ya ampamaala ha patêl ha Panginoon

¹ Amêhêñ, ay main akon iaral kamoyun toa ya ampamaala ha mipapatêl kan Panginoon Jesu-Cristo. Hikoy kapareho yon ampamaala ya nakahêlêk hêñ hadyay pamagdusa ya dinanas na, haka makapikiatag ako lano ha pamipamwang ya kapahiléw ya panga-Diyos na. ² Dapat yon hayhayêñ ya hilay patêl ha Panginoon bahêñ ya nanad tupa ni Apo Namalyari, ya impatsiwala na kamoyu. Daygêñ yoy habayto hêñ boon nakêm hêñ main kahiglaan, alwan ha angkapilitan kaw haka alwan gawan labay yo hêñ magkamain pera. ³ Paan yon daygêñ ámo ya sarili yo ha impahayhay kamoyu, noa, dapat hikaw ya mag-in alimbawa la, ya tuwarêñ la. ⁴ Ta ha pag-orong lano ni Apo Jesu-Cristo, ya pinakapoon pastol, ya ampanay-hay kantamo, ay mangêd ya mag-in primyo yo, ta makapakilamo kaw ha kapahiléw ya panga-Diyos na ya ayn anggaan.

⁵ Hikaw etaman ya miyawhay, haka hikaw ya dalaga, haka hikaw ya anak pon, ay palokop kaw kanlan toa ya ampamaala kamoyu. Hikaw ya ampaniwala kan Apo Jesu-Cristo, ay magpakaaypa kaw ngan hêñ maghuyo ha miha ta miha, ta êmêñ di ya nakahulat ha Kahulatan ya impahulat ni Apo Namalyari:

“Anhalanghangén ni Apo Namalyari hilay ma-paglambung, noa, an-ingalwan na hilay maaypay nakêm.”

⁶ Kabay magpakaaypa kaw, haka kaw palokop ha kapangyarihan ni Apo Namalyari, ta êmên na kaw itag-ay lano. ⁷ Ipatsiwala yo kana ya kayaghan hêñ ihip yo, ta hiyay panay hêñ ampangillag kamoyu. ⁸ pigilên yoy sarili yo, haka pakaillag kaw, ta hi Satanas, ya kapatsi yo, ay nanad ha mi-hay leon ya ampilibot-libot hêñ ampan-êngêl hêñ ampanlêk hêñ madawhong nan iboon. ⁹ Kabay pakataniêhêñ yoy paniwala yo, ta êmên yo ya mal-abanan, ta muwang yo etaman ya hilay patêl yo ha Panginoon ha boon luta, ay ampakaranas êt hêñ êmbayroy pamagdusa. ¹⁰ Alwan mabuyot ya pamakaranas yon pamagdusa. Haka pamakayarin habayto, ay daygên na kaw hêñ mangêd ni Apo Namalyari, ya maingaloêñ, ya nanagyat kamoyu hêñ makilamo ha ayn kapantag ya karangalan na hêñ angga-angga, gawan ha pakikimiha yo kan Apo Jesu-Cristo. Pataniêhêñ nay paniwala yo, haka dyanan na kaw hêñ kakhawan ha pamaghuyo yo kana. ¹¹ Hiyan taganá ya ayn kapantag ha kapangyarihan ya magpa ayn angga! Amen.

Tawlin pangumusta

¹² Hinulatan kataw hêñ hata naipêk ya hulat, ha hawop ni Silvano ya an-ibilang kon mapaypaniwal-an ya patêl ko ha Panginoon. Hinulatan kataw ta êmên pahiglaêñ ya nakêm yo, haka ta êmên paptêgan ya angkaranasan yo, ay pêtêg hêñ ubat ha ingalo ni Apo Namalyari. Ihundo yoy pamimiyay yo ha ingalo na. ¹³ Hilay

patêl ha Panginoon ya angkapi-tsi-tsipon ha Babilonia, ya kapareho yon pinili ni Apo Namalyari hên mag-in kana, ay ampangumusta kamoyu. Hi Marcos, ya anlugurên kon anak ha paniwala ay ampangumusta êt kamoyu. ¹⁴ No mangapipihêlêk kaw, ay migagalang kaw ta êmêñ mahêlêk ya ampilulugud kaw.

An-ihalangin kataw ya main pakikimiha kan Apo Jesu-Cristo, ya magkamain kaw hên kap-atêkbêkan nakêm.

**Ya habi ni apo namalyari: Bayon tsipan - Ayta
Mag-antsi
New Testament in Ayta, Mag-antsi**

copyright © 2006 Wycliffe Bible Translators, Inc.

Language: Mag-antsi Ayta (Ayta, Mag-antsi)

Translation by: Wycliffe Bible Translators

Contributor: Wycliffe Bible Translators, Inc.

Copyright Information

© 2006, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

Printed book ISBN 9789718260654

The New Testament

in Ayta, Mag-antsi

© 2006, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

xx

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2015-03-17

PDF generated using Haiola and XeLaTeX on 22 Feb 2024 from source files
dated 29 Jan 2022

d2289d90-e8af-5f04-a1e1-312fd0921aff